

DS

724

T53


1870

v. 1


THE UNIVERSITY OF  
CHICAGO  
LIBRARY

663
















百將圖傳







序

謹案

四庫兵家將苑一卷舊本題漢諸葛武侯撰百將傳一百卷宋張預撰廣名將譜十七卷不著撰人名氏百將傳始太公終劉鄩傳末綜論行事以孫子兵法比合之立說迂淺將苑及廣名將譜則又坊肆依託三書均列存目未稱盡善日昌奉

命撫吳承綠營窳弊之餘大亂甫定鄰疆猶徵饗紛沓無暇自顧屯練僅就撫標額兵併饗精募常日討而訓之其人大抵淮徐驍果經戰之士足振往日頹靡顧英畧而知方之難也吾是以有百將圖之作始周訖明皆



取其卓然可師尙者令吾軍人以投原餘暇轉相講說  
徐觀其材之可用與否夫兵事之可言者器也法也其  
不可強者智也勇也而所以鼓其智勇運其器法者仁  
也廉也緩急有事文武股肱非其人莫勝

國家捍圉之任然則兵可不慎謀而良將可不深注意  
哉古人言兵之可恃在明其分數又言運用之妙存乎  
一心未有離準繩規矩而求神明變化者則是書亦造  
就將才之資也同治九年夏六月豐順丁日昌序



百將圖傳序

百將圖傳二卷傳各一人圖各一事兩生中丞輯刊以訓士卒者蓋席其知方之略而生其督効之誠以見伊古將才生不擇地用不擇人一旦建不世之功足以震驚中外非偶然焜耀旂常也夫將才之難也運用之妙善乎乘機紀律之明恃乎立法而又氣足以懾之智足以決之鋪觀乎前史已然之迹以審求成敗得失之由設身於艱鉅交集之場頓發其敵愾同仇之誼若者爲大將若者爲名將傳頌徧婦孺聞合到孫吳古今人何必相懸遠耶予忝專閫厯有年所日簡材官以練其技武爰起偏裨建牙方面者不乏其人焉三吳之士抑吾



舊部也回憶壬癸間趨兵東下始與軍人共甘苦漚瀆  
上枕戈鳴櫓夜分喁喁大抵懷忠憤志果毅相詔相勉  
此景恍在目前仰賴

天子神靈事得早歲昔之壯士今猶盛年人雖椎魯習  
曉公義召之南畝還之南畝聽其羸老豈不重自削弱  
乎哉且大難克平民氣初靖江海之交涵淹百族憑凌  
狡伺往往而有中丞旣拊養吾人又訓迪之亦固以備  
他盜與非常乎我士卒益宜講明節度謹守條教上副  
國家諮求頗收之勤循覽是編亦使予舉義淝淮之初  
志一暢焉然則中丞之注意將才又豈唯善撫吾人已  
哉同治九年十月合肥李鴻章序



百將圖傳上目錄

呂尙

磻溪坐釣

孫武

吳宮教戰

孫臏

馬陵伏弩

樂毅

濟上勞軍

李牧

雁門縱牧

田單

火牛破敵

韓信

登壇拜將

樊噲

鴻門闖宴

周亞夫

細柳式車

李廣

冥山射虎



衛青

鉗徒論相

霍去病

渡河受款

祭遵

雅歌投壺

王霸

冰合滹沱

馮異

荒亭進粥

耿弇

宮臺望戰

寇恂

高平斬使

賈復

受檄擊郾

吳漢

無終奪軍

馬援

聚米爲山

臧宮

城門斷限



班超

投筆封侯

耿恭

疏勒拜泉

張奐

酌酒還金

虞翊

增竈斷追

張飛

釋嚴定蜀

趙雲

截江救主

張遼

合肥陷陣

典韋

牙門建纛

許褚

曳牛驚賊

周瑜

赤壁縱火

太史慈

神亭搏戰



甘甯

酌酒厲兵

鄧艾

陰平鑿險

王濬

鐵鎖沈江

陶侃

官齋運甕

周處

長橋搏蛟

朱伺

鐵面督戰

毛寶

踏鞍拔箭

王鎮惡

蒙衝沂渭

周訪

塚間埋肉

檀道濟

唱籌量沙

沈慶之

狐帽嚇蠻



宗慤

製獅禦象

周山圖

望蔡伏兵

周盤龍

父子突圍

羊侃

觀稍折樹

楊大眼

齊鑣射獵

韋孝寬

射還賞格



趙雲  
張飛  
關羽



磻溪坐釣







呂尙周

呂尙者東海上人。本姓姜。從其先祖封於呂。故名呂尙。字子牙。尙抱經天緯地之才。嘗著有六韜。備言陰陽。遂爲兵書之祖。時值商紂暴虐。避居東海之濱。坐石磯垂釣。絲不設餌。釣不曲鉤。每言不釣魚。鼈獨釣王侯。人多笑之。困窮老矣。聞西伯賢善養老。遂往歸焉。入岐州。復釣於磻溪之上。欲干西伯。西伯自羨里歸。將出獵。命卜有所獲否。卜者曰。所獲非龍非鸞。非虎非熊。乃王霸之輔。西伯喜而獵。果遇尙於渭水之陽。與語大悅。曰。吾先君太公。嘗曰。當有聖人興。周子其是耶。太公望子久矣。故又號曰太公望。載與俱歸。時年八十有二。西伯尊之。



爲師問政。對曰。爲國有三策。敬天勤民。親賢而已。西伯  
善之。是時天下三分有二。西伯事殷不改。至武王嗣位。  
紂惡愈甚。武王方修文王之業。尊太公爲師。尙父。鷹揚  
東伐。太公因左仗黃鉞。右秉白旄。以誓眾曰。蒼兕蒼兕。  
總爾眾庶。與爾舟楫。後至者斬。遂觀兵於盟津。諸侯不  
期而會者八百國。皆曰。紂可伐也。遂克商。武王封師尙  
父於齊。後之言兵者。皆宗太公六韜爲本謀。



吳宮教戰







孫武周

孫武者齊人也。善用兵。著孫子十三篇。吳王闔廬往見之。難之。曰。子之十三篇。吾已盡觀矣。然言之易行之難。子可小試勒兵乎。孫子曰。可。吳王又難之。曰。勇悍易柔弱難。子可試以婦人乎。孫子曰。可。吳王異之。乃出宮中。美婦百八十人。命孫子教戰。孫子受命。遂分爲二隊。以王之寵姬二人各爲隊長。皆令持戟。因教之。曰。汝知汝心與左右手與背乎。婦人曰。知之。孫子曰。凡鼓前則視心。左則視左手。右則視右手。後則視背。不可違。婦人曰。諾。孫子約束既布。設鈇鉞三令五申。於是鼓之。右婦人以爲戲而大笑。孫子曰。約束不明。申令不熟。將之過也。



復三令五申而鼓之左。婦人復大笑。孫子曰。今申令既已明。而鼓之不如法者。吏士之罪也。法當斬。因命斬左。右二隊長。吳王從臺上觀。大駭。趨使下令勿斬。孫子曰。臣已受命爲將矣。將在軍。君命有所不受。遂斬二姬。以殉。用其次爲隊長。復鼓之。婦人左右前後跪起。悉如紀律。無敢出聲。孫子乃使使報王曰。兵已整齊。請王下觀。惟王所用。雖赴水火可也。吳王心知孫武能用兵。遂以爲將。



馬陵弩伏







孫臏周

孫臏者。孫武之後世子孫也。與龐涓同學兵法。後歸齊。田忌忌數與諸公子馳逐。重射博利。前者勝。臏見其馬足不甚相遠。而馬有上中下輩。往往相配而出。故勝負不決。因謂忌曰。取君下駟與彼上駟。取君上駟與彼中駟。取君中駟與彼下駟。忌如之。既馳三輩畢。忌一不勝。而再勝。卒得王千金。於是忌以孫臏爲能。進於威王。威王問以兵法。遂以爲師。

魏使龐涓伐韓。齊威王使忌爲將。臏爲師。以救韓。直走大梁。龐涓聞之。去韓歸救魏。逐齊師。臏因謂忌曰。兵法百里而趣利者蹶。上將五十里而趣利者軍半至。因使



齊軍入魏地爲十萬竈。明日爲五萬。又明日爲二萬。涓見之喜曰。我固知齊軍怯。入吾地三日亡去過半矣。乃棄其步軍。與其輕銳倍日併行逐之。臚度其行暮當至馬陵。馬陵道狹。可伏兵。乃斫大樹白而書之曰。龐涓死此樹下。因令萬弩夾道伏。期日暮見舉火而發。涓果夜至斫樹下。見白書。乃鑽火燭之。萬弩俱發。魏軍大亂。龐涓乃自剄曰。遂成豎子之名。臚以此名重天下。世傳其兵法。



濟軍  
上勞







樂毅周

樂毅者。其先祖曰樂羊。爲魏文侯將。伐取中山有功。文侯封以靈壽。子孫因家焉。毅生而賢。善用兵。是時齊大敗燕。燕昭王怨齊。未嘗一日忘報。毅因請於魏王而使燕。燕昭王一見。卽以客禮待之。毅感其誠。遂委質而臣燕。昭王喜。竟以爲亞卿。因問伐齊之事。毅對曰。齊地大人眾。未易獨攻也。王必欲伐之。莫若與趙及楚魏合。燕昭王以爲然。因別遣使連楚魏。先使毅約趙惠文王。毅復令趙囑秦以伐齊之利。是時諸侯正害齊之驕暴。皆爭合從與燕伐齊。毅還報。燕昭王悉起兵。使毅爲上將軍。趙惠文王復以相國印授毅。毅遂并護趙楚韓魏燕。



以伐齊。因大破之。濟西諸侯兵罷歸。而毅將燕軍獨追至臨淄。齊湣王敗亡。走保於莒。樂毅攻入臨淄。盡取齊寶財物祭器。輸之燕。燕昭王大悅。親至濟上勞軍。行賞饗士。封樂毅於昌國。號爲昌國君。



雁牧

門

縱







李牧周

李牧者趙之北邊良將也。常居代雁門備邊。患爲約曰。邊若有患。急入收保邊。士願請一戰。牧乃選車得千三百乘。選騎得萬三千匹。百金之士五萬人。曾破敵受穀賞百金者者十萬人。悉勤習戰。然後大縱畜牧。人民滿野。邊寇小入。佯北不勝。以數千人委之。單于聞之。大率眾來入牧。出其不意。多爲奇陣。張左右翼擊之。遂大破單于十餘萬。因而奔走。不敢犯趙邊境者十有餘年。



精

大

平

海



火牛破敵







田單周

田單者齊諸田疏屬也。湣王時爲臨淄市掾。燕使樂毅破齊。單時在安平。知必有變。令宗人盡斷其車軸。末以鐵籠之。已而燕軍攻安平。城壞。齊人走爭塗。多以轉折車敗。爲燕所虜。惟單宗人以車鐵籠故得脫。

燕圍卽墨。卽墨士大夫知單鐵籠之智。遂推單爲將軍。因宣言曰。吾惟恐燕軍剽所得齊卒。置之前列。與我戰。卽墨殘矣。燕人聞之。如其言。城中見齊降者盡剽。愈堅守。恐爲所得。單又縱反間曰。吾恐燕人掘我城外塚墓。可爲寒心。燕人果掘燒死人。城上望見。涕泣欲戰。怒百倍。單知士卒可用。乃身操版插。與士卒分功。妻妾編行。



伍閒令甲士皆伏老弱女子乘城遣使約降於燕又收民金千鎰令卽墨富家賂燕將願無夷掠吾族家妻妾燕將大喜由此益懈單乃收城中牛千餘絳衣龍文束兵於角束炬於尾燒其端夜縱牛出壯士五千隨之走燕軍燕軍大驚以爲神師也城上鼓譟從之老弱皆擊銅器爲聲聲震天地燕軍奔走齊人遂殺其將騎劫而齊七十餘城皆復



登壇拜將







韓信

漢

韓信者淮陰人也。布衣時不能治生。釣於城下。諸母漂有一母見信飢飯信。終漂數十日。信喜謂漂母曰。吾必有以重報母。母怒曰。大丈夫不能自食。吾哀王孫而進食。豈望報乎。後數與蕭何語。何奇之。言於漢王。拜爲將。擇良日齋戒。設壇場具禮。諸將皆喜。人人各自以爲得大將。至拜大將。乃韓信也。一軍皆驚。

韓信與張耳以兵數萬東下井陘。擊趙。未至井陘口三十里。半夜傳發。選輕騎二千入。持一漢幟。從閒道草山而望趙軍。誠曰。趙見我走。必空壁逐我。汝疾入趙壁。拔趙幟立。漢赤幟。平旦大戰。良久。信佯走。趙果空壁逐之。



信所出奇兵二千馳入趙壁拔趙幟立漢赤幟趙軍退還歸壁皆漢赤幟大亂漢兵夾擊之大破趙兵

淮陰少年嘗謂信雖長大好帶刀劍怯耳眾辱信曰能死刺我不能出胯下於是熟視俛出胯下一市皆笑信以爲怯後信爲楚王召所從食漂母賜千金召辱已少年令出胯下者以爲中尉告諸將曰此壯士也方辱我時甯不能死死之無名故忍而就此



鴻門宴  
闖







樊噲

漢

樊噲。沛人也。以屠狗爲事。後與高祖俱隱於芒碭山澤。閒陳勝初起。蕭何曹參使噲求迎高祖。立爲沛公。噲以舍人從沛公擊章邯。攻城先登。斬首二十三級。賜爵列大夫。從攻陽城。先登。下戶牖。破李由軍。斬首十六級。賜上聞爵。項羽在戲下。欲攻沛公。沛公從百餘騎。因項伯面見項羽。謝罪。項羽既饗軍士。鴻門中酒亞夫謀欲殺沛公。令項莊拔劍舞。坐中欲擊沛公。項伯常屏蔽之。時獨沛公與張良得入坐。樊噲居營外。聞事急。乃持盾入。初入營。營衛止噲。噲直撞入。立帳下。怒目眦。髮上指。冠項羽目之。問爲誰。張良曰。沛公驂乘樊噲也。項羽曰。



壯士。賜之卮酒。彘肩。噲既飲酒。拔劍切肉食之。項羽曰。能復飲乎。噲曰。臣死且不辭。豈特卮酒乎。且沛公先入定咸陽。暴師霸上。以待大王。今日至。聽小人之言。與沛公有隙。臣恐天下解心疑大王也。項羽默然。沛公如廁。麾噲去。是日微噲奔入營。譙讓項羽。沛公幾殆。



車細柳式

百將圖專上 周亞夫

七







周亞夫

漢

周亞夫者。絳侯勃子也。漢文帝封爲條侯。文帝六年。匈奴大入邊。亞夫爲將軍。軍細柳。上自勞軍。軍士披甲。銳兵刃。彀弓弩。持滿。天子先驅至。不得入。先驅曰。天子且至。軍門都尉對曰。將軍令曰。軍中聞將軍令。不聞天子之詔。上至。又不得入。乃使使持節詔將軍。吾欲入勞軍。亞夫乃傳言開壁門。壁門士吏謂從屬車騎曰。將軍約軍中不得驅馳。於是天子乃按轡徐行。至營。將軍亞夫持兵揖曰。介冑之士不拜。請以軍禮見。天子爲動。改容式車。使人稱謝。皇帝敬勞將軍。成禮而去。

孝景三年。吳楚反。亞夫爲太尉。東擊吳楚。吳方攻梁。梁



急請救。太尉引兵走昌邑。深壁而守。梁日使使請太尉。守便宜不肯往。梁上書言。景帝使使詔救梁。太尉堅壁不出。而使輕騎絕吳楚兵後食道。吳兵乏糧餓。數欲挑戰。終不出。夜軍中驚。內相攻擊。擾亂。至太尉帳下。太尉終卧不起。後吳奔壁東南。太尉使備西北。已而其精兵果奔西北。不得入。乃引而去。太尉出精兵追逐。大破之。降其兵。月餘。越人斬吳王頭以告。而吳楚平。



冥山射虎







李廣

漢

李廣者隴西成紀人也。漢景帝時爲上郡太守。匈奴入上郡。景帝使中貴人從廣擊之。中貴人以數十騎馳騁。見匈奴三人與戰。三人射傷中貴人。殺其騎且盡。中貴人奔告廣。廣曰。此必射雕者也。乃以百騎往殺其二人。生得一人。果射雕者也。縛之上馬。匈奴驚。盡上山列陣。有白馬將出護其兵。廣突前射殺之。胡兵至夜半皆引去。廣乃歸其大軍。李廣與兄弟共獵於冥山之北。見卧虎焉。射之一矢。卽斃。斷其髑髏以爲枕。示服猛也。鑄銅象其形爲洩器。示厭辱之也。他日復獵於冥山之陽。又見卧虎。射之。沒矢。飲羽。進而視之。乃石也。其形類虎。退



而更射。鏃破斨折而石不傷。



相鉗徒論







衛青 漢

衛青字仲卿。嘗從人至甘泉。有一鉗徒相青曰。貴人也。官至封侯。青笑曰。人奴之生。得免笞罵卽足矣。安得封侯事乎。元光六年。以椒房戚拜爲車騎將軍。擊匈奴。斬首虜數百騎。賜爵關內侯。是後凡匈奴犯邊。皆有斬獲。又畧定邊地甚廣。遂拜青爲大將軍。益封青八千七百戶。三子皆侯。

衛青擊匈奴。諸將各斬獲有功。獨蘇建以三千騎戰敗。盡亡其軍。獨以身歸。青問建罪當如何。周霸曰。自大將軍出。未嘗斬裨將。今建棄軍可斬。以明將軍之威。青曰。青幸得以肺腑待罪行間。不患無威。而霸說我以明威。



甚失臣意。且使臣職雖當斬將。以臣之尊寵而不敢專  
誅於境外。其歸天子自裁之。於以風爲人臣不敢專權。  
不亦可乎。軍吏皆曰善。



款渡河受







霍去病 漢

霍去病者大將軍衛青姊子也。年十八善騎射。從大將軍爲嫖姚校尉。嘗與輕勇騎八百直棄大軍數百里。赴利。斬獲首虜過當。封爲冠軍侯。後爲嫖騎將軍。與公孫敖、李廣、張騫等分道擊匈奴。去病涉鈞耆。濟居延。遂臻小月氏。斬獲甚眾。諸宿將士馬皆不如去病。由是去病日以親貴。比大將軍。

渾邪王欲降漢。使人馳傳以聞。上恐其詐降而襲邊。乃令去病將兵往迎之。去病旣渡河。與渾邪眾相望。渾邪王裨將多不願降。欲遁去。去病乃馳入與渾邪王相見。斬其欲亡者八千人。遂獨遣渾邪王乘傳先詣行在。然



後將其降者號十萬人。渡河歸上。封渾邪王爲漯陰侯。  
嘉去病之功。以千七百戶益封驃騎將軍。上嘗欲教之  
孫吳兵法。去病對曰。顧方畧何如耳。不至學古兵法。上  
爲治第對曰。匈奴未滅。何以家爲。上益重愛之。



壺雅歌投







祭遵

漢

祭遵字弟孫。潁川潁陽人。光武破王尋等。還過潁陽。遵以縣吏數進見。留爲門下吏。從征河北。爲軍東令。舍中兒犯法。遵格殺之。光武怒。命收遵。主簿劉副諫曰。明公常欲眾軍整齊。今遵奉法不避。是教令行也。光武乃賞之。以爲刺姦將軍。謂諸將曰。當避祭遵。吾舍中兒犯法。尙殺之。必不私諸卿也。

拜征虜將軍。南擊弘農。厭新柏華蠻中賊。弩中遵口。洞出流血。眾見遵傷。稍引退。遵呼叱止之。士卒戰皆百倍。遂大破之。時新城蠻中山賊張滿屯結要隘。爲人害。詔遵攻之。遵絕其糧道。滿數挑戰。遵堅壁不出。而厭新柏



華餘賊復與滿合。遵乃分兵擊破之。張滿饑困。城拔。生  
獲之。遵爲將軍。取士皆用儒術。對酒設樂。必雅歌投壺。  
雖在軍旅。不忘俎豆。可謂好禮悅樂守死善道者也。遵  
卒後。遇朝會。帝每歎曰。安得憂國奉公之臣如祭征虜  
者乎。



冰 沱

合

滹







王霸漢

王霸字元伯。潁州潁陽人也。光武南馳至滹沱河。王郎兵在後。候吏譁言。河水流澌。無船不可渡。官屬大懼。帝遣霸往視之。霸返。詭曰。冰堅可渡。官屬皆喜。遂前。河冰果合。乃令霸護渡。未畢數騎而冰解。帝曰。王霸權以濟事。殆天瑞也。帝卽位。拜霸爲偏將軍。使與捕敵將軍馬武討周建。蘇茂將四千餘人救建。先遣精騎遮武軍糧。武往救之。建從城中出兵夾擊武。武恃霸之援。戰不甚力。軍敗。奔霸營。呼救。霸曰。敵兵盛出。必兩敗。弩力而已。乃閉營堅壁。軍吏皆爭之。霸曰。茂兵精銳。眾多。吾吏士心恐。而捕敵與吾相恃。敗道也。今閉營固守。捕敵無救。



其戰自倍。吾乘其敝。乃可克也。茂建果悉出攻武。武合戰良久。霸乃開營。後出精騎夾擊。茂建敗走。霸武始各歸營。旣而賊復挑戰。霸方饗士作樂。茂雨射營中。中霸前酒樽。安坐不動。軍吏皆曰。茂前日已破。今易擊也。霸曰。客兵遠來。糧食不足。故數挑戰。以徼一勝。今閉營休士。所謂不戰而屈人之兵也。賊不得戰。乃引還營。其夜建兄子誦反。閉城拒之。茂建遁去。誦以城降。



荒亭進粥







馮異漢

馮異字公孫。潁川文城人也。好讀書。通左氏春秋。孫子兵法。光武道經文城。異開門以牛酒迎。光武念之。遂以異爲主簿。及王郎起。光武自薊東南馳至饒陽蕪萁亭。時天寒冽。眾皆飢疲。異具豆粥。及至南宮。遇大風雨。光武引車入道旁空舍。異抱薪。鄧禹爇火。光武對竈燎衣。異復進麥飯。兔肩。因復渡滹沱河。使異別收河閒兵。還拜偏將軍。異爲人謙退。不伐。諸將並坐論功。異常獨立樹下。軍中號大樹將軍。

建武三年春。拜異爲征西大將軍。與鄧禹鄧宏共攻赤眉。異與賊約期合戰。先使壯士蠻服與赤眉同。伏於道。



側旦日赤眉使萬人攻異前部。異分兵救之。賊見勢弱。遂悉眾攻異。異乃縱兵大戰。日昃。賊氣少衰。伏兵卒起。衣服相同。赤眉不復識別。眾遂驚潰。異乘勝追擊。大破之。降者八萬人。



官臺望  
戰







耿弇 漢

耿弇字伯昭。茂陵人也。少習父明經之學。因見郡尉試騎士。建旌旗。肆馳射。由是好將帥之事。光武時。封好畤侯。建武五年。詔弇進討張步。步使大將軍費邑軍厯下邑。遣其弟敢守巨里。弇乃進兵先脅巨里。使多伐木。揚言以填塞坑塹。後三日。當悉力攻巨里。陰縱生口。令得生還。以告邑。邑果自將精兵以救之。弇喜曰。吾揚言欲誘致邑來耳。今邑來。適合吾所求也。卽分三千人守巨里。自引精兵上岡坂。乘高合戰。大破之。斬邑首以示巨里。城中城中懼。費敢悉眾亡歸張步。弇因縱兵擊諸未下者四十餘營。遂定濟南。弇兵出淄水上。張步氣盛直



攻弇營。與劉歆等合戰。弇升王宮壞臺望之。視歆等交鋒。乃自引精兵橫突步陣於東城下。大破之。飛矢中弇股。弇以佩刀截之。左右無知者。時帝在魯。聞弇爲步所攻。自往救之。未至。陳俊謂弇曰。劇賊兵盛。可且閉營休士。以待上來。弇曰。乘輿且到。臣子當擊牛釀酒以待百官。反欲以賊虜遺君父耶。乃出兵大戰。自旦及昏。復大破之。



高平斬使







寇恂 漢

寇恂字子翼。上谷昌平人也。初爲上谷郡功曹。後拜偏將軍。及光武南定河南而難其守。問於鄧禹。禹曰。寇恂文武足備。乃拜恂河內太守。更始將朱鮪聞光武北伐。以河內必孤。遂使蘇茂賈強將兵三萬渡鞏。攻溫。檄書至。恂卽勒軍馳出。軍吏諫曰。宜待眾軍畢集。乃可。恂曰。溫乃郡之藩蔽。失溫則郡不可守。遂馳赴之。適馮異遣救至。旛旗蔽野。乃令士卒乘城大呼曰。劉公兵到。蘇茂軍聞之。陣動。恂因奮擊。大破之。斬賈強。

隗囂將高峻據高平。大將軍耿弇圍之不克。帝親征。遣恂以璽書招降峻。遣軍師皇甫文出謁。辭禮不屈。恂怒。



命誅文。諸將曰。今欲降之。反戮其使。無乃不可。恂不應。竟斬之。遣其副歸告峻。曰。軍師無禮。已戮之。欲降則降。不降則固守。峻惶恐。卽日開門降。諸將皆賀。因曰。敢間殺其使而降其城。何也。恂曰。皇甫文。峻之腹心。今來辭意不屈。必無降心。全之則文得其計。殺之則峻亡其膽。是以降耳。諸將皆服曰。非所及也。恂經明行修。名重朝廷。所得秩俸。厚施朋友故人。嘗曰。吾因士大夫以致此。其可獨享乎。人稱長者。以爲有宰相器。



受 檄 擊  
郾







賈復漢

賈復字君文。南陽冠軍人。光武在河北。復因鄧禹得召見。光武與語奇之。禹亦稱其有將帥節。乃以復爲破敵將軍。督盜賊。復馬羸。光武解左驂賜之。從擊青犢於射犬。衆大戰至日中。賊陣堅不却。光武傳召復曰。吏士皆饑。可且朝飯。復曰。先破之。然後食耳。因披甲先登。所向皆靡。賊乃敗走。諸將咸服其勇。

光武卽位。拜復爲執金吾。封冠軍侯。時更始鄧王尹尊及諸大將在南方未降者尙多。帝召諸將議兵事。因以檄叩地曰。鄧最強。宛爲次。誰當擊之。復率然對曰。臣請擊鄧。帝笑曰。執金吾擊鄧。吾復何憂。遂遣復擊鄧。連戰



破之月餘。尹尊降。盡定其地。復從征伐。未嘗喪敗。數爲諸將潰圍解急。身被十二創。帝以復敢戰深入。希令遠征。常自從之。故復少方面之勳。諸將每論功。自伐復未嘗有言。帝輒曰。賈君之功。我自知之。定封膠東侯。



無終奪軍







吳漢

吳漢字子顏。南陽宛人。光武將發幽州兵。問可使行者。鄧禹薦漢。卽拜大將軍。持節北發十郡突騎。更始幽州牧苗曾聞之。陰勒兵。敕諸郡不應調。漢將二十騎先馳至無終。曾以漢無備。出迎於客舍。漢卽揮兵斬之。而奪其軍。北州震駭。遂悉發其兵。引而南。與光武會涪陽。諸將見漢士馬強盛。皆曰。是寧肯分與人耶。及漢至幕府。上兵簿。諸將人人多請之。光武曰。屬者恐不與人。今所請又何多也。諸將皆慙。

漢伐公孫述。連勝拔廣都。帝戒漢勿輕進。漢因乘利進。逼成都。去城十餘里。阻江北爲營。作浮橋。使副將劉尚



屯河南。相去二十餘里。帝聞大驚。讓漢曰。公既深入。又與尙別營。緩急不復相及。尙敗公卽敗矣。幸無他者。急還廣都。詔書未到。述果遣謝豐袁吉十萬眾攻漢。別將萬人劫尙。漢與大戰一日。兵敗走入壁。豐吉圍之。漢召諸將曰。今與劉尙二處受圍。勢旣不接。其禍難量。若潛師就尙於江南。大功可立。諸將曰。諾。遂閉營三日。多立旛旗。烟火不絕。夜銜枚出。與尙合軍。豐等不覺。明日分兵拒水北。自攻江南。漢悉兵迎戰。大破之。斬豐吉。於是引還廣都。



聚米為山







馬援漢

馬援字文淵扶風茂陵人少有大志爲部督郵送犯至司命府見有重罪援哀而縱之遂亡命北地遇赦因留牧畜轉游隴漢閒嘗謂賓客曰丈夫爲志窮當益堅老當益壯因處田牧至有牛馬羊數千頭穀數萬斛旣而歎曰凡殖貨財產貴其能施賑也否則守錢奴耳乃盡散以頒昆弟故舊身衣羊裘皮袴

帝自西征囂至漆諸將多以王師之重不宜深入險阻計猶豫未決會召援夜至援因說帝隗囂將帥有土崩之勢兵進有必破之狀又於帝前聚米爲山谷指畫形勢開示眾軍所從道徑往來分晰曲直昭然可曉帝曰



敵在吾目中矣。明旦遂進軍。囂眾大潰。



限城

問

斷







臧宮 漢

臧宮字君翁。潁川郟人也。從光武征戰。諸將多稱其勇。光武甚親納之。以爲偏將軍。建武十一年。將兵至中廬。屯駱越。是時公孫述等與岑彭相拒於荊門。彭等戰數不利。越人遂欲謀反。從蜀宮兵少。不能制。會屬縣送委輸車數百乘至宮。夜使人鋸斷城門限。令車聲回轉出入。至旦。越人候伺者聞車聲不絕。而門限斷。相告以漢兵大至。其渠帥乃奉牛酒以勞軍。宮陳兵大會。擊牛醢酒。饗賜慰納之。越人遂安。宮與岑彭破荊門。宮將降卒五萬人。時人多食少。轉輸不至。降者皆欲散畔。郡邑復更保聚。觀成敗。宮欲引還。恐爲所及。會帝遣謁者將兵。



詣岑彭。有馬七百匹。宮遂矯制。取以自益。晨夜進兵。多張旗幟。登山鼓噪。左步右騎。挾船而行。呼聲動山谷。延岑不意。漢軍卒至。登山望之。大震恐。宮因縱擊。大破之。斬首溺死萬餘人。水爲之濁流。延岑奔成都。其眾悉降。盡獲其兵馬珍寶。自是乘勝追北。進攻綿竹。破涪城。斬公孫述弟恢。復攻拔繁郫。進軍咸陽門。與吳漢共滅公孫述。蜀地悉平。拜宮爲廣漢太守。封鄼侯。



侯投筆封







班超漢

班超字仲叔扶風平陵人也家貧常爲官傭書久勞苦因投筆歎曰大丈夫當立功異域以取封侯安能久事筆硯閒乎有相者指曰生燕頤虎頭飛而食肉此萬里封侯相也都尉竇固出擊胡以超爲假司馬與從事郭恂俱使西域超到鄯善鄯善王廣奉超禮意甚備後忽疎懶超謂官屬曰廣禮忽薄必有北敵使來乃會吏士三十六人與其飲酒酣激怒之眾曰死生惟司馬超曰不入虎穴焉得虎子今當因夜以火攻敵眾曰當與從事議之超曰吉凶決於今日從事文俗吏聞此必恐而謀泄眾曰善會天大風超令十人持鼓伏敵舍後約曰




見火發當鳴鼓大呼。餘人各持兵弩夾門而伏。超乃順風縱火。前後鼓譟。敵眾驚亂。遂斬北使。及從士三十餘人。餘眾百人悉燒死。明日乃還。告郭恂。恂大驚。既而色動。超知其意。因曰。從事雖不行。超何心獨擅之。郭恂乃悅。超因召鄯善王。以敵首示之。一國震驚。遂納子爲質。還奏竇固。固大喜。具上超功。



疏 勤 拜  
泉







耿恭 漢

耿恭字伯宗。慷慨多大畧。有將帥才。漢始置西域都護。戊巳校尉。以恭爲之。屯金蒲城。敵攻之。恭乘城搏戰。以毒藥傳矢。傳語北軍曰。漢家箭神。其中瘡必有異。因發强弩射之。敵中矢者。視瘡皆沸。會天暴風雨。隨風雨擊之。殺傷甚衆。北人震怖。相謂曰。漢兵神真可畏也。恭以疏勒城旁有澗水。可固。引兵據之。北人遂於城下擁絕澗水。恭於城中穿井十五丈。不得水。吏士渴乏。竿馬糞汁而飲之。恭仰歎曰。聞昔貳師將軍拔佩刀刺山。飛泉湧出。今漢德神明。豈有窮哉。遂整衣冠再拜。爲吏士禱。有頃。水泉奔出。衆皆稱萬歲。乃令吏士揚水以示敵。敵



出不意以爲神明遂引去



金酌酒還







張奐

漢

張奐字然明。燉煌酒泉人也。舉賢良。擢拜安定屬國都尉。初到職。而南單于左莫鞬等七千餘人寇美稷。東羌復欲舉種應之。而奐壁惟二百許人。聞報卽勒兵而出。軍吏以力不敵。叩頭爭止。奐不聽。遂進屯長城。收集兵士。遣將王衛招誘東羌。因據要地。使南單于不得交通。東羌諸豪遂相率與奐和親。其擊左莫鞬等。連戰破之。羌豪帥感奐恩德。上馬二十匹。先零酋長又遺金鑠八板。奐召主簿於諸羌前。以酒酹地曰。使馬如羊。不以入廐。使金如粟。不以入懷。悉以金馬還之。羌性貪而貴吏。清前都尉率好財貨。爲所患苦。奐正身潔己。威化盛行。



遷爲護遼中郎將時屠各及朔方烏桓並同反叛燒度  
遼將軍皇甫規門引屯赤阬烟火相望兵眾大恐各欲  
亡去。奐坐帷中與弟子講誦自若軍賴以安。乃潛誘烏  
桓陰與通和。遂使斬屠各渠帥。襲破其眾。諸羌悉降。延  
熹元年。鮮卑寇邊。奐率南單于擊之。斬首數百級。幽并  
清靜。九年春。召拜大司農。鮮卑聞奐去。遂招結南單于  
烏桓數道入塞寇掠。朝廷以爲憂。復拜奐爲護遼中郎  
將。諸羌聞奐至。相率還降。凡二十萬口。奐但誅其首惡。  
餘慰納之。邊境復安。



增 迫

寵

斷







虞詡漢

虞詡字升卿。陳國武平人也。初辟太尉府。朝歌賊甯季等數千人。攻殺長吏。州郡不能制。因以詡爲朝歌長。故舊弔之。詡曰。不遇槃根錯節。無以別利器。始到。謁河內太守馬稜。曰。朝歌者韓魏之郊。背太行。臨黃河。去敖倉百里。而青冀之流亡萬數。賊不知開倉招眾。劫庫兵守成臯。斷天下右臂。吾知其無能爲也。今其眾新盛。難與爭鋒。兵不厭權。願寬假轡策。勿令有所拘閼而已。及到官。設三科以募求壯士。其攻劫者爲上。傷人偷盜者次之。帶裘服而不事家業者爲下。收得百餘人。詡爲饗會。悉貰其罪。使入賊中。誘令劫掠。乃伏兵以待之。遂殺賊。



數百人。又潛遣貧人能縫者。傭作賊衣。以綵線縫其裾。爲識。有出市里。吏輒擒之。賊由是駭散。咸稱神明。後羌寇武都。鄧太守以詡有將帥之畧。遷武都太守。羌乃率眾數千。遮詡於陳倉嶠谷。詡卽停軍不進。而宣言上書請兵。須到當發。羌聞之。乃分鈔旁縣。詡因其兵散。遂日夜進道。兼行百餘里。令吏士各作兩竈。日增倍之。羌不敢逼。或問曰。孫臏減竈。而君增之。兵法日行不過三十里。今日且二百里。何也。詡曰。敵眾多。吾兵少。徐行則爲所及。速進則彼所不測。敵見吾竈日增。必謂郡兵來迎。眾多行速。必憚追我。孫臏見弱。吾今示強勢。有不同耳。旣到郡。兵不滿三千。而羌眾萬餘。攻圍赤亭。戰之日。詡



乃令軍中強弩勿發。而潛發小弩。羌以爲矢力弱。不能至。并兵急攻。詡於是使二十強弩共射一人。發無不中。羌大震退。詡因出城奮擊。多所殺傷。明日悉陳其兵。眾令從東郭門出。北郭門入。改易衣服。回轉數周。羌不知其數。更相恐動。詡計賊當退。乃潛遣五百餘人於淺水設伏。候其走路。敵果大奔。因掩擊大破之。軍威甚盛。賊由是散敗。南入益州。詡乃占相地勢。築營壁共八十所。招還流亡。假貸貧人。郡遂以安。後遷尙書令。臨終謂子恭曰。吾事君直道。行已無愧。所悔者爲朝歌長時殺賊數百人。不能無冤者。自此二十餘年。家門不增一口。獲罪於天也。







